

145  
1  
48

東 京 圖 書 館				
一 冊	號	六 架	二 九 函	和 書 門 類

立正安國論

訓  
點  
附

全



立正安國論



日自近年至近日天變地夭飢饉疫癘  
廣迤地上牛馬斃巷骸骨充路招死之

輩既超大半不悲之族敢無一人然間或專利劍

即是之文唱西土教主之名或恃衆病悉除之願

誦東方如來之經或仰病即消滅不老不死之詞

崇法華真實之妙文或信七難即滅七福即生之

句調百座百講之儀有因秘密真言之教灑五瓶



之水有全坐禪入定之儀澄空觀之月若書七鬼神之號而押千門若圖五大力之形懸萬戶若拜天神地祇而企四角四塚之祭祀若哀萬民百姓而行國主國宰之德政雖然唯摧肝膽彌逼飢疫乞客溢目死人滿眼卧屍為觀並尸作橋觀夫二離合璧五緯連珠三寶在世百王未窮此世早衰其法何廢是依何禱是由何誤矣  
主人曰獨愁此事憤悱胸臆客來共嘆屢致談話

夫出家而入道者依法而期佛也而今神術不協佛威無驗具覲當世之體愚發後生之疑然則仰圓覆而吞恨俯方載而深慮倩傾微管聊披經文世皆背正人悉歸惡故善神捨國而相去聖人辭所而不還是以魔來鬼來灾起難起不可不言不可不恐

客曰天下之灾國中之難余非獨嘆衆皆悲今入蘭室初承芳詞神聖去辭灾難並起出何經哉聞



其證據矣

主人曰其文繁多其證弘博金光明經云於其國土雖有此經未嘗流布生捨離心不樂聽聞亦不供養尊重讚歎見四部衆持經之人亦復不能尊重乃至供養遂令我等及餘眷屬無量諸天不得聞此甚深妙法背甘露味失正法流無有威光及以勢力增長惡趣損減人天墜生死河乖涅槃路世尊我等四王并諸眷屬及藥叉等見如斯事捨

其國土無擁護心非但我等捨棄是王亦有無量守護國土諸大善神皆悉捨去既捨離已其國當有種種灾禍喪失國位一切人衆皆無善心唯有繫縛殺害瞋諍互相譏諂枉及無辜疫病流行彗星數出兩日並現薄蝕無恒黑白二虹表不祥相星流地動井內發聲暴雨惡風不依時節常遭飢饉苗實不成多有他方怨賊侵掠國內人民受諸苦惱土地無有可樂之處上大集經云佛法實隱沒



鬚髮爪皆長諸法亦忘失當時虛空中大聲震於地一切皆徧動猶如水上輪城壁破落下屋宇悉圯坊樹林根枝葉華葉菓藥盡唯除淨居天欲界一切處七味三精氣損減無有餘解脫諸善論當時一切盡所生華菓味希少亦不美諸有井泉池一切盡枯涸土地悉鹹鹵剖裂成丘澗諸山皆燦燃天龍不降雨苗稼皆枯死生者皆死盡餘草更不生兩土皆昏闇日月不現明四方皆亢旱數現

諸惡瑞十不善業道貪瞋癡倍增衆生於父母觀之如犛鹿衆生及壽命色力威樂減遠離人天樂皆悉墮惡道如是不善業惡王惡比丘毀壞我正法損滅天人道諸天善神王悲愍衆生者棄此濁惡國皆悉向餘方上仁王經云國土亂時先鬼神亂鬼神亂故萬民亂賊來劫國百姓亡喪臣君太子王子百官共生是非天地恠異二十八宿星道日月失時失度多有賊起亦云我今五眼明見三世



一切國王皆由過去世侍五百佛得為帝王主是為一切聖人羅漢而為來生彼國土中作大利益若王福盡時一切聖人皆為捨去若一切聖人去時七難必起上已藥師經云若刹帝利灌頂王等災難起時所謂人衆疾疫難他國侵逼難自界叛逆難星宿變恠難日月薄蝕難非時風雨難過時不雨難上已仁王經云大王吾今所化百億須彌百億日月一一須彌有四天下其南閻浮提有十六大國五

百中國十千小國無量粟散國其國土中有七可畏難一切國王為是難故云何為難日月失度時節反逆或赤日出黑日出二三四五日出或日蝕無光或日輪一重二三四五重輪現為一難也二十八宿失度金星彗星輪星鬼星火星水星風星刀星南斗北斗五鎮大星一切國主星三公星百官星如是諸星各各變現為二難也大火燒國萬姓燒盡或鬼火龍火天火山神火人火樹木火賊火如是變恠



爲三難也大水澗沒百姓時節及逆冬兩夏雪冬時雷電霹礮六月雨米霜雹雨赤水黑水青水雨土山石山兩沙礫石江河逆流浮山流石如是變時爲四難也大風吹殺萬姓國土山河樹木一時滅沒非時大風黑風赤風青風天風地風火風水風如是變爲五難也天地國土亢陽炎火洞然百草亢旱五穀不登土地赫燃萬姓滅盡如是變時爲六難也四方賊來侵國內外賊起火賊水賊風

賊鬼賊百姓荒亂刀兵劫起如是恠時爲七難也大集經云若有國王於無量世修施戒慧見我法滅捨不擁護如是所種無量善根悉皆滅失其國當有三不祥事一者穀貴二者兵革三者疫病一切善神悉捨離之其王教令人不隨從常爲隣國之所侵燒暴火橫起多惡風雨暴水增長吹漂人民內外親戚其共謀叛其王不久當遇重病壽終之後生大地獄中乃至如王夫人太子大臣城主



村主郡守宰官亦復如是已上夫四經文明萬人  
誰疑而盲瞽之輩迷惑之人妄信邪說不辨正教  
故天下世上於諸佛衆經生捨離之心無擁護之  
志仍善神聖人捨國去所是以惡鬼外道成災致  
難矣

客作色日後漢明帝者悟金人之夢得白馬之教  
上官太子者誅守屋之逆成寺塔之構爾來上自  
一人下至萬民崇佛像專經卷然則叡山南都園

城東寺四海一川五畿七道佛經星羅堂宇雲布  
鷲子之族則觀鷲頭之月鶴勒之流亦傳鷄足之  
風誰謂褊一代之教廢三寶之跡哉若有其證委  
聞其故矣

主人喻曰佛閣連甍經藏並軒僧者如竹葦侶者  
似稻麻崇重年舊尊貴日新但法師諂曲而迷惑  
人倫王臣不覺而無辨邪正仁王經云諸惡比丘  
多求名利於國王太子王子前自說破佛法因緣



破國因緣其王不別信聽此語橫作法制不依佛  
戒是爲破佛破國因緣上涅槃經云菩薩於惡象等  
心無恐怖於惡知識生怖畏心爲惡象殺不至三  
趣爲惡友殺必至三趣上法華經云惡世中比丘邪  
智心諂曲未得謂爲得我慢心充滿或有阿練若  
納衣在空閑自謂行真道輕賤人間者貪著利養  
故與白衣說法爲世所恭敬如六通羅漢乃至常  
在大衆中欲毀我等故向國王大臣婆羅門居士

及餘比丘衆誹謗說我惡謂是邪見人說外道論  
議濁劫惡世中多有諸恐怖惡鬼入其身罵詈毀  
辱我濁世惡比丘不知佛方便隨宜所說法惡口  
而頓蹙數數見擯出上涅槃經云我涅槃後無量百  
歲四道聖人悉復涅槃正法滅後於像法中當有  
比丘似像持律少讀誦經貪嗜飲食長養其身雖  
著袈裟猶如獵師細視徐行如猫伺鼠常唱是言  
我得羅漢外現賢善內懷貪嫉如受啞法婆羅門



等實非沙門現沙門像邪見熾盛誹謗正法曰上  
就文見世誠以然矣不誠惡侶者豈成善事哉  
客猶憤曰明王因天地而成化聖人察理非而治  
世世上之僧侶者天下之所歸也於惡侶者明王  
不可信非聖人者賢哲不可仰今以賢聖之尊重  
則知龍象之不輕何吐妄言強成誹謗以誰人謂  
惡比丘哉委細欲聞矣

主人曰後鳥羽院御宇有法然上卷作選擇集矣則破

一代之聖教徧迷十方之衆生其選擇云道綽淨  
師立聖道淨土二門而捨聖道正歸淨土之文初  
聖道門者就之有二乃至准之思之應存密大及  
以實大然則今具言佛心天台華嚴三論法相地  
論攝論此等八家之意正在此也曇鸞法師往生  
論注云謹案龍樹菩薩十住毗婆沙云菩薩求阿  
毗跋致有二種道一者難行道二者易行道此中  
難行道者即是聖道門也易行道者即是淨土門



也淨土宗學者先須知此旨設雖先學聖道門人  
若於淨土門有其志者須棄聖道歸於淨土又云  
善導和尚立正雜二行捨雜行歸正行之文第一  
讀誦雜行者除上觀經等往生淨土經已外於木  
小乘顯密諸經受持讀誦悉名讀誦雜行第三禮  
拜雜行者除上禮拜彌陀已外於一切諸佛菩薩  
等及諸世天等禮拜恭敬悉名禮拜雜行私云見  
此文亦須捨雜修專豈捨百即百生專修正行堅執

千中無一雜修雜行乎行者能思量之又云貞元  
大藏錄中始自大般若經六百卷終于法常住經  
顯密大乘經摠六百三十七部二千八百八十三  
卷也皆須攝讀誦大乘之一句當知隨他之前躔  
雖開定散門隨自之後還閉定散門一開以後未  
不閉者唯是念佛一門又云念佛行者必可具足  
三心之文觀無量壽經云同經疏云問云若有解  
行不同邪雜人等防外邪異見之難或行一分二



分群賊等噉齧者即喻別解別行惡見人等私云  
又此中言一切別解別行異學異見等者是指聖  
道門已又最後結句文云夫速欲離生死二種勝  
法中且闕聖道門選入淨土門欲入淨土門正雜  
二行中且拋諸雜行選應歸正行已就之見之引  
曇鸞道綽善導之謬釋建聖道淨土難行易行之  
旨以法華真言摠一代之大乘六百三十七部二  
千八百八十三卷一切諸佛菩薩及諸世天等皆

攝聖道難行雜行等或捨或閉或闕或拋以此四字  
多迷一切剩以三國之聖僧十方之佛弟子等皆號  
群賊併令罵詈近背所依淨土三部經唯除五逆  
誹謗正法誓文遠迷一代五時之肝心法華經第  
二若人不信毀謗此經乃至其人命終入阿鼻獄  
誠文者也於是代及未代人非聖人各容冥衢並  
志直道悲哉不拊瞳矇痛哉徒催邪信故上自國  
主下至土民皆謂經者無淨土三部之外經佛者



無彌陀三尊之外佛仍傳教義真慈覺智證等或  
涉萬里之波濤而所渡之聖教或廻一朝之山川  
而所崇之佛像若高山之巔建華果以安置若深  
谷之底起蓮宮以崇重釋迦藥師之並光也施威  
於現當虛空地藏之成化也被益於生後故國主  
寄郡鄉以明燈燭地頭充田園以備供養而依法  
然之撰擇則忘教主而貴西土之佛陀拋付屬而  
閣東方之如來唯專四卷三部之經典空拋一代

五時之妙典是以非彌陀之堂皆止供佛之志非  
念佛之者早忘施僧之懷故佛閣零落瓦松之煙空  
老僧房荒廢庭草之露屢深雖然各捨護惜之心並  
廢建立之思是以住持聖僧行而不歸守護善神  
去而無來是偏依法然之選擇也悲哉數十年之  
間百千萬之人被蕩魔緣多迷佛教好謗忘正善  
神不成怒哉捨圓好偏惡鬼不得便哉不如修彼  
萬祈禁此一凶矣



客殊作色曰我本師釋迦文說淨土三部經以來  
曇鸞法師捨四論講說一向歸淨土道綽禪師閣  
涅槃廣業偏弘西方行業善導和尚拋雜行立事修  
慧心僧都集諸經之要文宗念佛之一行貴重彌  
陀誠以然矣又往生之人其幾哉就中法然聖人  
幼少而昇天台十七而涉六十卷並究八宗具  
得大意其外一切經論七遍反覆章疏傳記莫不  
究者智齊日月德越先師雖然猶迷出離之趣不

辨涅槃之旨故徧觀悉鑑深思遠慮遂拋諸經專  
修念佛其上蒙一夢之靈應弘四裔之親疎故或  
號勢至之化身或仰善導之再誕然則十方貴賤  
低頭一朝男女運步爾來春秋推移星霜相積而  
柔疎釋尊之教恣譏彌陀之文何以近年之災課  
聖代之時強毀先師更罵聖人吹毛求疵剪皮出  
血自昔至今如此惡言未聞可惶可慎罪業至重  
科條爭道對座猶以有恐携杖而則欲歸矣



主人笑止曰習辛蓼葉忘梟溷廁聞善言而思惡  
言指謗者而謂聖人疑正師而擬惡侶其迷誠深  
其罪不淺聞事起委談其趣釋尊說法之內一傳  
五時之間立先後辨權實而曇鸞道綽善導既就  
權忘實依先捨後未探佛教淵底者就中法然雖  
酌其流不知其源所以者何以大乘經六百三十  
七部二千八百八十三卷并一切諸佛菩薩及諸  
此天等置捨閉閣拋之字蕩一切衆生之心是偏

展私曲之詞全不見佛經之說妄語之至惡口之  
科言而無比責而有餘人皆信其妄語悉貴彼選  
擇故崇淨土之三經而拋衆經仰極樂之一佛而  
忘諸佛誠是諸佛諸經之怨敵聖僧衆人之雠敵  
也此邪教廣弘八荒周遍十方抑以近年之災難  
課往代之由強恐之聊引先例可悟汝迷止觀第  
二引史記云周未有被髮袒身不依禮度者弘決  
第二釋此文引左傳曰初平王之東遷也伊川見



被髮者而於野祭識者曰不及百年其禮先亡爰  
知徵前顯穴後致又阮藉逸才蓬頭散帶後公卿  
子孫皆教之奴苟相辱者方達自然搏節競持者  
呼爲甲舍是爲司馬氏滅相比又案慈覺大師入  
唐巡禮記云唐武宗皇帝會昌元年勅令章敬寺  
鏡霜法師於諸寺傳彌陀念佛教每寺三日巡輪  
不絕同二年廻鷓國之軍兵等侵唐塚同三年河  
北之節度使忽起亂其後大蕃國更拒命迴鷓國

重奪地元兵亂同秦項之代突火起邑里之際何  
況武宗大破佛法多滅寺塔不能撥亂遂以有事  
取<sub>上</sub>意以此惟之法然者後烏羽院御宇建仁年中  
之者也彼院御事既在眼前然則大唐殘例吾朝  
顯證汝莫疑汝莫恠唯須捨凶歸善塞源截根矣  
客聊和曰未究淵底數知其趣但自花洛至柳營  
釋門在樞捷佛家在棟梁然未進勘狀不及上  
奏汝以賤身輒吐莠言其義有餘其理無謂



主人曰予雖爲少量忝學大乘蒼蠅附驥尾而渡  
萬里碧蘿懸松頭而延千尋弟子生一佛之子事  
諸經之王何見佛法之衰微不起心情之哀惜其  
上涅槃經云若善比丘見壞法者置不呵責駢遣  
舉處當知是人佛法中怨若能駢遣呵責舉處是  
我弟子真聲聞也余雖不爲善比丘之身爲道佛  
法中怨之責唯撮大綱粗示一端其上去元仁年  
中自延曆興福兩寺度度經奏聞申下勅宣御教

書法然之選擇印板取上大講堂爲報三世佛恩  
令燒失之於法然墓所仰付感神院大神人令破  
却其門弟隆觀聖光成覺薩生等配流遠國其後  
未許御勘氣豈未進勘狀云也

客則和曰下經謗僧一人難論然而以大乘經六  
百三十七部二千八百八十三卷并一切諸佛善  
薩及諸世天等載捨閑閣拋四字其詞勿論也其  
文顯然也守此瑕瑾成其誹謗迷而言歟覺而語



欺賢愚不辨是非難定但災難之起因選擇之由  
盛增其詞彌談其旨所詮天下泰平國土安穩君  
臣所樂士民所思也夫國依法而昌法因人而貴  
國亡人滅佛誰可崇法誰可信哉先祈國家須立  
佛法若消災止難有術欲聞  
主人曰余是頑愚敢不存賢唯就經文聊述所存  
抑治術之旨內外之間其文幾多具難可舉但入  
佛道數迴愚案禁謗法之人重正道之侶國中安

穩天下泰平即涅槃經云佛言唯除一人餘一切  
施皆可讚歎純陀問言云何名爲唯除一人佛言  
如此經中所說破戒純陀復言我今未解唯願說  
之佛語純陀言破戒者謂一闍提其餘在所一切  
布施皆可讚歎獲大果報純陀復問一闍提者其  
義云何佛言純陀若有比丘及比丘尼優婆塞優  
婆夷發麤惡言誹謗正法造是重業永不改悔心  
無懺悔如是等人名爲趣向一闍提道若犯四重



作五逆罪自知定犯如是重事而心初無怖畏懺悔不肯發露於彼正法末無護惜建立之心毀些輕賤言多過咎如是等人亦名趣向一闍提道唯除如此一闍提輩施其餘者一切讚歎又云我念往昔於閻浮提作大國王名曰仙豫愛念敬重大乘經典其心純善無有麤惡嫉恚善男子我於爾時心重大乘聞婆羅門誹謗方等聞已即時斷其命根善男子以是因緣從是已來不墮地獄又云

如來昔爲國王行菩薩道時斷絕爾所婆羅門命又云殺有三謂下中上下者蟻子乃至一切畜生唯除菩薩示現生者以下殺因緣墮於地獄畜生餓鬼具受下苦何以故是諸畜生有微善根是故殺者具受罪報中殺者從九夫人至阿那含是名爲中以是業因墮於地獄畜生餓鬼具受中苦上殺者父母乃至阿羅漢辟支佛畢定菩薩墮於阿鼻大地獄中善男子若有能殺一闍提者則不墮



此三種殺中善男子彼諸婆羅門等一切皆是一  
闡提也上仁王經云佛告波斯匿王是故付屬諸國  
王不付屬比丘比丘尼何以故無王威力涅槃經  
云今以無上正法付屬諸王大臣宰相及四部衆  
毀正法者大臣四部之衆應當苦治又云佛言迦  
葉以能護持正法因緣故得成就是金剛身善男  
子護持正法者不受五戒不修威儀應持刀劍弓  
箭鉞槊又云若有受持五戒之者不得名為大乘

人也不受五戒為護正法乃名大乘護正法者應  
當執持刀劍器仗錘持刀杖我說是等名曰持戒  
又云善男子過去之世於此拘尸那城有佛出世  
號歡喜增益如來佛涅槃後正法住世無量億歲  
餘四十年佛法未滅爾時有一持戒比丘名曰覺  
德爾時多有破戒比丘聞作是說皆生惡心執持  
刀杖逼是法師是時國王名曰有德聞是事已為  
護法故即便往至說法者所與是破戒諸惡比丘



極其戰鬪爾時說法者得免厄害王於爾時身被  
刀劍箭鏃之瘡體無完處如芥子許爾時覺德尋  
讚王言善哉善哉王今真是護正法者當來之世  
此身當為無量法器王於是時得聞法已心大歡  
喜尋即命終生阿閼佛國而為彼佛作第一弟子  
其王將從人民眷屬有戰鬪者有歡喜者一切不  
退菩提之心命終悉生阿閼佛國覺德比丘却後壽  
終亦得往生阿閼佛國而為彼佛作聲聞衆中第

三弟子若有正法欲滅盡時應當如是受持擁護  
迦葉爾時王者則我身是說法比丘迦葉佛是迦  
葉護正法者得如是等無量果報以是因緣我於  
今日得種種相以自莊嚴成就法身不可壞身佛  
告迦葉菩薩是故護法優婆塞等應執持刀杖擁  
護如是善男子我涅槃後濁惡之世國土荒亂互  
相抄掠人民飢餓爾時多有為飢餓故發心出家  
如是之人名為禿人是禿人輩見護持正法馳逐



令出若殺若害是故我今聽持戒人依諸白衣持  
刀杖者以為伴侶雖持刀杖我說是等名曰持戒  
雖持刀杖不應斷命法華經云若人不信毀謗此  
經即斷一切世間佛種乃至其人命終入阿鼻獄  
經上夫經文顯然私詞何加九如法華經者謗大  
乘經典者勝無量五逆故墮阿鼻大城永無出期  
如涅槃經者設詐五逆之供不許謗法之施殺蟻  
子者必落三惡道禁謗法者定登不退位所謂覺

德者是迦葉佛有德者則釋迦文也法華涅槃之  
經教者一代五時之肝心也其禁實重誰不歸仰  
哉而謗法之族忘正道之人剩依法然之選擇彌  
增愚癡之盲瞽是以或忍彼遺體而露木畫之像  
或信其妄說而彫羨言之カキ模弘之海內翫之墉外  
所仰則其家風所施則其門弟然間或切釋迦之  
手指結彌陀之印相或改東方如來之鴈字居西  
土教主之鵝王或止四百餘迴之如法經成西方



淨土之三部經或停トク天台大師講為善道講如此  
群類其誠難盡是非破佛哉是非破法哉是非破  
僧哉此邪義則依選擇也嗟呼悲哉背如來誠諦  
之禁言哀矣隨愚侶迷惑之麤語早思天下之靜  
謐者須斷國中之謗法矣

客曰若斷謗法之輩若絕佛禁之違者如彼經文  
可行斬罪歟若然者殺害相加罪業何為哉則大  
集經云剃頭著袈裟持戒及毀戒天人可供養彼

則為供養我是我子若有搥打彼則為打我子若  
罵辱彼則為毀辱我料知不論善惡無擇是非於  
為僧侶可屢供養何打辱其子忝悲哀其父彼竹  
杖之害目連尊者也求沉無間之底提婆達多之  
殺蓮華比丘尼也久咽阿鼻之焰先證斯明後昆  
寂恐似誡謗法既破禁言此事難信如何得意  
主人云客明見經文猶成斯言心之不及歟理之  
不通歟全非禁佛子唯偏惡謗法也夫釋迦之以



前佛教者雖斬其罪能仁之以後經說者則止其施然則四海萬邦一切四衆不施其惡皆歸此善何難並起何災競來矣

客則避席刷襟曰佛教斯區旨趣難窮不審多端理非不明但法然聖人選擇現在也以諸佛諸經諸菩薩諸天等載捨閑閣拋其文顯然也因茲聖人去國善神捨所天下飢渴世上疫病今主人廣引經文明示理非故妄執既翻耳目數朗所詮國

土泰平天下安穩自一人至萬民所好也所樂也  
早止一闡提之施求致衆僧尼之供收佛海之白  
浪截法山之綠林世成義農之世國爲唐虞之國  
然後斟酌法水之淺深崇重佛家之棟梁矣  
主人悅曰鳩化爲鷹雀變爲蛤悅哉汝交蘭室之  
友成麻畝之性誠顧其難專信此言風和浪靜不  
日豐年耳但人心者隨時而移物性者依境而改  
譬猶水中之月動波陣前之軍靡劔汝當座雖信



後定永志若欲先安國土而祈現當者速廻情慮  
急加對治所以者何藥師經七難內五難忽起二  
難猶殘所以他國侵逼難自界叛逆難也大集經  
三災內二災早顯一災未起所以兵革災也金光  
明經內種種災過一一雖起他方怨賊侵掠國內  
此災未露此難未來仁王經七難內六難今盛一  
難未現所以四方賊來侵國難也加之國土亂時  
先鬼神亂鬼神亂故萬民亂今就此文具案事情

百鬼早亂萬民多亡先難是明後災何疑若所殘  
之難依惡法之科並起競來者其時何為哉帝王  
者基國家而治天下人臣者領田園而保世上而  
他方賊來而侵逼其國自界叛逆而掠領其地豈  
不驚哉豈不騷哉失國滅家何所遁世汝須思一  
身之安堵者先禱四表之靜謐者歟就中人之在  
世各恐後生是以或信邪教或貴謗法各雖惡迷  
是非而猶哀歸佛法何同以信心之力妄宗邪義



之詞哉若執心不翻亦由意猶存早辭有爲之鄉  
必墮無間之獄所以者何大集經云若有國王於  
無量世修施戒慧見我法滅捨不擁護如是所種  
無量善根悉皆滅失乃至其王不久當遇重病壽  
終之後生大地獄中如王夫人太子大臣城主村主  
郡主宰官亦復如是仁王經云人壞佛教無復孝  
子六親不和天神不祐疾疫惡鬼日來侵害來恠首  
尾連襜縱橫死入地獄餓鬼畜生若出爲人兵奴

果報如響如影如人夜書火滅字存三界果報亦  
復如是法華經第二云若人不信毀謗此經乃至  
其人命終入阿鼻獄又同第七卷不輕品云千劫  
於阿鼻地獄受大苦惱涅槃經云遠離善友不聞  
正法住惡法者是因緣故沉沒在於阿鼻地獄所  
受身形縱橫八萬四千廣披衆經專重謗法悲哉  
皆出正法之門而深入邪法之獄愚矣各懸惡教  
之經而鎮纏謗教之網此朦霧之迷沉彼盛焰之



底豈不愁哉豈不苦哉汝早改信仰之寸心速歸  
實乘之一善然則三界皆佛國也佛國其衰哉十  
方悉寶土也寶土何壞哉國無衰微土無破壞身  
是安心是禪定此詞此言可信可崇矣  
客曰今生後生誰不慎誰不恐披此經文具承佛  
語誅謗之科至重毀法之罪誠深我信一佛拋諸  
佛仰三部經而閣諸經是非私曲之思則隨先達  
之詞十方諸人亦復如是今世者勞性心來生者

隨阿鼻文明理詳不可疑彌仰貴公之慈誨益開  
愚客之癡心速廻對治早致泰平先安生前更扶  
沒後唯非我信又誠他誤耳

文應元年太歲庚申九月勘之 御年三十九

以御正本校之畢



立正安國論 與書

天明三<sup>癸卯</sup>年十月原 版  
明治十五年一月十日再版御届  
同 年同月 刻 成

定價金拾八錢


京都府平民

原版人并二  
再版出版人

村上勘兵衛


上京區第廿九組墨華院前之町  
四百五十三番地







145  
1  
48



020189-000-1

145-48

立正安国論

日蓮/著

M15.1

ABH-0404

